
یوہ آکا شوانی جموں بے محمد سفیر تے غلام سرورتیں خبر سُنو۔ پہلاں خاص خاص خبر۔

1★ وزیر داخلہ امت شاہ نے اظہارِ رکيو ٻے جے ”دوڑ برائے یکجہتی“ وکست بھارت واسطے اک قرار داد ٻے۔
2★ حفاظتی دستاں نے جموں غا اکھنور سیکٹر مانہ 3 دہشت گرد ہلاک کر دتا ہیں۔
3★ وزیر اعظم نریندرمو دی نے کہیو جے قوم غی ترقیاتی رفتار اُس ویلے تیز وے جد شہری تندرست ویں۔ اُنہاں نے صحت با رے کئی پروجیکٹاں غو آغاز تے افتتاح وی کیو۔

4★ تے وزیر اعظم نریندرمو دی نے ویڈیو کا نفرنگ غے ذریعے 51 ہزار تقرری نامہ تقسیم کیا۔

خبراں غی تفصیل نال پہلاں محمد سفیر۔

Run For Unity

مرکزی وزیر داخلہ امت شاہ نے اج سویرے نوی دہلی غا میجر دھیان چند نیشنل اسٹیڈیم مانہ اتحا واسطے دوڑ یعنی ”رن فار یو نیٹی“ نانہ جھنڈی دس غے روانہ کیو۔ یاد رہ جے اس دوڑ غو انتظام سردار ولہ بھائی پٹیل غا جنم تہاڑا غا سلسلہ مانہ کیو گیو ٻے۔ جن غو جنم 31 اکتوبر 1875ء مانہ ہوؤ تھو۔ اس موقعہ و ر بولتاں واں اُنہاں نے کہیو جے یاہ دوڑ صرف مُلکی اتحاد واسطے ہی اک قرار داد نہیں بلکہ وکست بھارت واسطے اک قرار داد ٻے۔ سردار پٹیل غا مُلکی اتحاد با رے کیا گیا کماں غو ذکر کرتاں واں اُنہاں نے کہیو جے سردار پٹیل نے شاہی ریا ستاں نانہ مُلک سنگ جوڑن مانہ اہم کردار ادا کیو ٻے۔ اُنہاں نے اس موقعہ و ر سردار پٹیل نانہ بھارت رتن دین مانہ تا خیر کرن ورسوال چایو۔ وزیر اعظم نریندرمو دی غو ذکر کرتاں واں کہیو جے اُنہاں نے سردار پٹیل غی یاد تازہ رکھن واسطے گجرات مانہ اُن غو دُنیا غو سب تیں اُچو مجسمو تعمیر کیو ٻے۔ اس موقعہ و روزیر داخلہ غے ہمراہ مرکزی وزراء

مانسکھ ما نڈویا، منوہر لال، نتیا نند رائے غے علا وہ دہلی غا ایل جی وی کے سکسینہ
وی موجو د تھا۔ اور اس دوڑ مانہ قریب 8 ہزار افراد نے حصو لیو۔

Run For Unity Jammu

جموں انتظامیہ غی طرفوں مُلک غا پہلا وزیر داخلہ سردار ولہ بھائی پٹیل غی جینتی
غے پیش نظر قومی یکجہتی تہاڑا غا سلسلہ مانہ رن فار یونٹی غو اہتمام کیو گیو۔
یاہ تقریب گلشن گراؤنڈ تیں شروع ہوئی تے بری سنگھ پارک مانہ پُج غے اختتام پذیر
ہوئی۔ اس سلسلہ مانہ اس تقریب مانہ صوبائی کمشنر جموں رامیش کمار، اے
ڈی جی پی جموں انند جین تے باقی عہدیداراں نے شمولیت کی۔ اس تیں علا وہ
مقامی بسنیکاں، طلباء وغیرہ نے وی اس تقریب مانہ حصو لیو۔ مہارا ضلع نامہ نگا
ر سنگ گل کرتاں واں صوبائی کمشنر نے اس طرح کہیو۔ بائٹ۔۔

Run for Unity Reasi

راشٹریہ ایکتا دیوس یعنی قومی اتحاد تہاڑا منان غا سلسلہ مانہ اج ریا سی مانہ
دوڑ برائے اتحاد تے راشٹریہ ایکتا عہد لین غو اہتمام کیو گیو۔ اس موقعہ ور سرکاری
افسراں، طلباء تے مقامی لوکاں نے مل غے سردار پٹیل غو جنم تہاڑو منایو۔ ضلع
ترقیاتی کمشنر ریا سی وشیش مہاجن نے ایس ایس پی ریا سی گورو سکھا رور غے
بمراہ دوڑ برائے اتحاد نانہ جھنڈی دس غے روانہ کیو۔ اس موقعہ ور بولتاں واں ڈی
سی ریا سی وشیش مہاجن نے اس طرح کہیو۔ بائٹ۔۔

Run for Unity Samba

راشٹریہ ایکتا دیو س یعنی قومی یکجہتی تہاڑا تے چل ریا ویجنس بیداری ہفتہ غا
حصہ غا طور ور ضلع انتظامیہ سانہ غی طرفوں اک متاثر کُن رن فار یونٹی
پروگرام غو انعقاد کیو گیو۔ اس پروگرام غی قیادت ضلع ترقیاتی کمشنر سانہ راجیش
شرما نے کی۔ اس سلسلہ مانہ اس پروگرام مانہ ضلع افسراں، طلباء، شہری
باشنداں نے شمولیت کر غے اتحاد تے قومی یکجہتی غا جذبہ نانہ فروغ دتو۔ رن فار
یونٹی غو پروگرام ضلع انتظامیہ کمپلیکس تیں شروع ہو غے سانہ پولیس سٹیشن غے
سامنے میدان مانہ پُج غے اختتام پذیر ہوؤ۔ اس موقع ور بولتاں واں ضلع ترقیاتی
کمشنر سانہ راجیش شرما نے اس طرح کہیو۔ بائٹ۔۔

Terrorist Killed

حفاظتی دستاں نے جموں غا اکھنور سیکٹر غا جنگل علا قہ مانہہ چھپا 2 ہو ر دہشت گرداں نانہہ ہلاک کر دتو ہے۔ یا د رہ جے قبضہ لکیر غے نزدیک جا ری اس ٹاکرہ مانہہ گُل 3 دہشت گرد مار دتا ہیں۔ مہارا نمائندہ غے مطابق گذشتہ کل مذکورہ علا قہ مانہہ فوج غی ایمبولینس ورگو لی چلان آلو دہشت گرد گزری شام فوج تے این ایس جی گا جواناں نے ہلاک کر دتو تھو۔ جد کہ دیگر 2 دہشت گرد فوج تے پولیس غا جواناں نے بٹل کھوڑ علا قہ مانہہ مار دتا ہیں۔ یوہ ٹاکرو ختم ہو گيو ہے۔ جد کہ ہلاک شدہ دہشت گرداں غی لاش برآمد کرن غی کا روائی اجوں جا ری ہے۔ یہ دہشت گرد قبضہ لکیر غے اُس پاسوں درانداز ہوا تھا جنہاں نے اک مندر غے نزدیک فوجی کانوائی ور حملو کیو تے فوج نے ویلا ور بی ایم پی 2 کمبیٹ انفنٹری گڈی ، بیلی کا پٹر رتے ڈراؤن غو استعمال کر غے ان نانہہ مار مکایو۔

Army Equipment LoC

جموں کشمیر غا سرحدی اضلاع راجو ری پونچھ مانہہ دہشت گردانہ حملان غی روک تھام واسطے بھارتی فوج نانہہ اعلیٰ قسم غا سازو سامان سنگ لیس کیو گيو ہے۔ ذرائع غے مطابق گذشتہ 2 ہفتاں غے اندر اندر گُل 7 دہشت گردانہ حملہ ہوا ہیں جن غا نتیجہ مانہہ 2 فوجی جواناں سمیت گُل 13 اموات ہو ئی ہیں۔ جموں کشمیر مانہہ ایسا حالات سنگ نمڑن واسطے بھارتی فوج جامعہ منصوبو اپنا رہی ہے۔ اسے منصوبہ غے تحت فوج نے گہراؤ تے تلاشی کا روائی غے نال نال دیگر آپریشنل کارکر دگی غے ذریعے دہشت گرداں غی کھوج کرن ور سرحد تے قریبی علا قہ ور نظر رکھی وی ہے۔ واضعہ جے راجوری پونچھ ضلعاں گا گھنا جنگلاں مانہہ راشٹریہ رائفل غا جوان مشکلات غے باوجود روزانہ غی بنیاد ور تلاشی کا روائی چلا رہیا ہیں۔

Accident Udhampur

ضلع اڈھم پور مانہہ اج اک منی بس گراں فارنہ غا مقام ور حادثہ غی شکار ہو گئی جس مانہہ گو رنمنٹ نر سینگ پیرا میڈیکل کالج کا طلبہ سوار تھا۔ مہارا ضلع غا نمائندہ اچن دوبے غے مطابق اس حادثہ مانہہ گُل 36 افراد زخمی ہوا ہیں جن مانہہ زیادہ تر طلباء ہیں۔ ضلع پولیس اڈھم پور نے فوراً جائے حادثہ ور پُچ غے

مقامی لوکاں غی مدد سنگ زخمیاں نانہہ علاج واسطے گو رنمنٹ میڈیکل کالج اُدھم پو ر داخل کیو۔ واضع رہ جے 4 افراد شدید زخمی ہوا ہیں جنہاں نانہہ مزید علاج واسطے جی ایم سی جموں ٹور دتو ہے۔ حادثہ غی اطلاع لبن تیں بعد ضلع ترقیاتی کمشنر اُدھم پو ر سلونی رائے، ایس ایس پی اُدھم پو ر نا گپو ری امود اشوک تے دیگر معزز شہری ہسپتال پُجیا۔

یہ خبر تم آکاشوانی جموں تیں نشر کی جا رہی ہیں خبراں غا باقی حصہ نال غلام سرور۔

PM Ayurveda

وزیر اعظم نریندر مو دی نے اج دھن وتری جینتی تے 9 واں آیو ر وید تہاڑا غا موقعہ و ر نوی دہلی مانہہ صحت غا شعبہ تیں متعلق لگ بھگ 12 ہزار 8 سو 30 کروڑ روپیاں غا متعدد پروجیکٹاں غو افتتاح تے سنگ بنیا د رکھیو۔ وزیر اعظم نے آیوشمان بھارت پر دھان منتری جن آروگیہ یوجنا مانہہ اک بڑا اضافہ غے طور و ر 70 سال تے اس تیں متی عمر غا بزرگ شہریاں با رے صحت کو ریج مانہہ توسیع غو وی آغاز کیو۔ وزیر اعظم نے بھارت غا پہلا آل انڈیا اینسی ٹیوٹ آف آیو روید غا دوجا مرحلہ غو وی افتتاح کیو۔ جس مانہہ اک پنچ کرما ہسپتال دوباں غی تیاری با رے اک آیو ر ویدک فارمیسی اج سپورٹس میڈسن یونٹ اک مرکزی لا بریری تے اس تیں علا وہ 500 سیٹاں آلو آڈوٹوریم شامل ہیں وزیر اعظم نے مدھیہ پردیش غا مندسور، نی مچ تے سیونی مانہہ 3 میڈیکل کالجاں غو وی افتتاح کیو۔ اس موقعہ و ر وزیر اعظم نے چھتیس گڑھ غا بلاس پور مانہہ سرکاری میڈیکل کالج مانہہ اک سپر سپیشلٹی بلاک تے بار گڑھ اُڑیشہ مانہہ اک کریٹکل کئیر بلاک غو وی افتتاح کیو۔ مدھیہ پردیش غا شیو پوری، رتلان، راج گڑھ تے مندسو مانہہ 5 نرسینگ کالج غی سنگ بنیا د وی رکھی گئی۔ وزیر اعظم نے کہیو کہ قوم غی ترقی اُس وقت تیزی سنگ وے جد اُس غا شہری صحت مند وے۔ اُنہاں نے مزید کہیو کہ اس ویزن غے نال مرکزی حکومت نے شہریاں غی بھلائی نانہہ ترجیح دیتاں واں صحت غی پالیسی غا 5 تہم قائم کیا ہیں۔ جن مانہہ احتیاطی صحت غی دیکھ بھال، بروقت تشخیص، سستی دوائی تے علاج، چھوٹا شہراں تے گرایاں مانہہ مناسب صحت غی دیکھ بھال غا شعبہ مانہہ ٹیکنالوجی غی توسیع شامل ہیں۔

PM Dhanteras

وزیر اعظم نریندر مودی نے اک سماجی میڈیا پوسٹ مانہ عوام نانہ دھن تیرس غی مبارکباد دتی ہے۔ اور اظہار کیو بھگوان دھن وتری ہر کسے نانہ صحت تے خوشی سنگ نوازے۔ اُنہاں نے قوم نانہ آیو روید تہاڑا غی وی مبارک دتی ہے۔ اور کہیو ہے جے آیو ر وید تندرست زندگی برقرار رکھن مانہ اہم کردار ادا کرے۔ اور بھگوان دھن وتری غو جنم تہاڑو آیو روید غی افادیت سنگ وابستہ ہے۔ جس نانہ دُنیا وی تسلیم کرے۔

PM Rozgar Mela

وزیر اعظم نریندر مودی نے بکھ بکھ محکماں مانہ بھرتی ہوا 51 ہزار تیں متا نوجواناں نانہ تقرری نامہ دین غا موقعہ و ر ویڈیو کا نفرنسنگ غے ذریعے بولتاں واں کہیو جے سرکار خود انحصار بھارت بنان واسطے ”میک ان انڈیا“ غے ذریعے ہر شعبہ مانہ بڑا پیمانہ ور کم کر رہی ہے۔ اور اس طرح بھارت دُنیا غی تیجی بڑی معیشت بنن آلی راہ ور گامزاً ہے۔ اُنہاں نے کہیو جے سرکار نے پرائم منسٹر انٹرنشپ سکیم غے تحت 5 سو جامع بھارتی کمپنیاں مانہ نوجواناں نانہ تربیت دین غو وی قدم چایو ہے۔ اور سرکار لگاتار نوجواناں نانہ مستقل روزگار غا موقعہ فراہم کرا رہی ہے۔ بریانہ غو ذکر کرتاں واں اُنہاں نے کہیو جے اُت نوی سرکار نے 26 ہزار نوجواناں نانہ روزگار غا موقع فراہم کیا ہیں۔ مہارا نمائندہ نے اطلاع دتی ہے جے یوہ روزگار ر میلو مُلک غا بکھ بکھ 40 مقامات ور منعقد کیو گیو ہے۔ اور مذکورہ بھرتی ہوا نوجواناں نانہ کم کاج غی بنیا دی تربیت برائے راست کرم یوگی پرارمبہ غے ذریعے دتی جائے گی۔ واضع رہے جے ”آئی گوٹ کرم یوگی“ پورٹل ور 14 سو ای لرننگ کورس موجود ہیں جن غے ذریعے کم کرن غا موثر طریقہ سیکھایا جائیں اور وکست بھارت بنان مانہ اہم کردار ادا کیو جا سکے۔

Rozgar Mela

جموں غا کنویشن مرکز مانہ روزگار غی اک اہم مہم غا سلسلہ مانہ روزگار ر میلہ غا دوجا مرحلہ مانہ 150 اُمیدواراں نے تقرری نامہ حاصل کیا ہیں۔ یہ تقرری نامہ زیادہ تر نوی پہرتیاں جن مانہ محکمہ ڈاک تے بھارتی ریلوے غا اُمیدواراں نانہ سونپیا گیا ہیں۔ اس تقریب مانہ رُکنِ پارلیمان جُگل کشور شرما تے باقی عہدیداراں

نے شرکت کی۔ وزیر اعظم نریندر مودی نے نواں تعینات ہون آلا اُمید واراں نانہہ
عملی طور ور خطاب کر غے قوم غی تعمیر مانہہ اُن غا کردار غی اہمیت ور زور دتو۔
اس سلسلہ مانہہ اُنہاں نے مُلک غا 40 مقامات ور 51 ہزار تقرری نامہ تقسیم کیا۔
اس موقعہ و ر بولتاں واں رُکنِ پا رلیمان جُگل کشور شرما تے نواں پہرتی ہوا اُمید
واراں نے اس طرح کہیو۔۔ با ٹٹ۔۔

اس غے نال ہی خبراں غو یوہ بلیٹن ختم ہوؤ۔